



Broj: 05/1-50-13-29-33-3/13
Sarajevo, 27.11.2013. godine

Na osnovu člana 3. Zakona o nezavisnim i nadzornim tijelima policijske strukture Bosne i Hercegovine („Službeni glasnik BiH“, broj 36/08), čl. 8. i 11. Poslovnika o radu Nezavisnog odbora kao nezavisnog tijela policijske strukture Bosne i Hercegovine („Službeni glasnik BiH“, broj 93/09) i Odluke o raspisivanju Javnog konkursa za provođenje procedure odabira kandidata na pozicije direktora i zamjenika direktora policijskih tijela Bosne i Hercegovine, broj: 05/1-50-13-29-33-2/13, od 27.11.2013., Nezavisni odbor kao nezavisno tijelo policijske strukture Bosne i Hercegovine r a s p i s u j e

JAVNI KONKURS

za provođenje procedure odabira kandidata za izbor direktora i zamjenika direktora policijskih tijela Bosne i Hercegovine

I. OSNOV

Nezavisni odbor kao nezavisno tijelo policijske strukture Bosne i Hercegovine, u skladu sa Zakonom o nezavisnim i nadzornim tijelima policijske strukture Bosne i Hercegovine („Službeni glasnik BiH“, broj 36/08) i Poslovníkom o radu Nezavisnog odbora kao nezavisnog tijela policijske strukture Bosne i Hercegovine („Službeni glasnik BiH“, broj 93/09), provodi postupak odabira najuspješnijih kandidata za pozicije:

1/01 Direktor Granične policije Bosne i Hercegovine

Broj izvršilaca: 1 (jedan)

1/02 Zamjenik direktora Granične policije Bosne i Hercegovine

Broj izvršilaca: 1 (jedan)

2/01 Zamjenik direktora Državne agencije za istrage i zaštitu

Broj izvršilaca: 1 (jedan)

3/01 Direktor Direkcije za koordinaciju policijskih tijela Bosne i Hercegovine

Broj izvršilaca: 1 (jedan)

3/02 Zamjenik direktora Direkcije za koordinaciju policijskih tijela Bosne i Hercegovine

Broj izvršilaca: 2 (dva)

II. OPIS POSLOVA

1/01 Direktor Granične policije Bosne i Hercegovine predstavlja Graničnu policiju; izrađuje godišnji plan rada, te godišnji budžet za Graničnu policiju i predlaže ih na usvajanje Vijeću ministara BiH posredstvom Ministarstva sigurnosti BiH; rukovodi i usmjerava poslove iz nadležnosti Granične policije; učestvuje u izradi državnog plana aktivnosti koji definira pitanja koja treba da budu preduzeta u vezi sa sprečavanjem ilegalnih migracija, kao i krivičnih djela i prekršaja iz nadležnosti Granične policije; definira operativnu strategiju za uspješno upravljanje granicom; osigurava pravilno izvršavanje smjernica i naloga tužioca o radnjama policijskih službenika u vezi s krivičnim postupkom; osigurava saradnju s agencijama za provođenje zakona, te ostalim odgovarajućim organima u BiH; osigurava provođenje međunarodnih sporazuma u oblasti nadzora i kontrole prelaska državne granice; predlaže nadležnom tijelu pokretanje pregovora vezanih za zaključivanje međunarodnih sporazuma o saradnji u vezi s pitanjima granice, vrši stalne analize radi racionalnog rasporeda osoblja i tehničkih sredstava; osigurava primjenu i poštivanje utvrđenih standarda profesionalnih vještina i obuke za osoblje; podnosi redovne izvještaje o radu i situaciji na terenu ministru sigurnosti BiH, a po potrebi ili na zahtjev ministra, podnosi i posebne izvještaje; dostavlja izvještaje Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev; obavlja i druge dužnosti propisane zakonom ili drugim propisima. Direktor je odgovoran za zakonit rad Granične policije i za zakonito trošenje sredstava dodijeljenih Graničnoj policiji iz budžeta institucija Bosne i Hercegovine i međunarodnih obaveza Bosne i Hercegovine.

1/02 Zamjenik direktora Granične policije zamjenjuje direktora u vrijeme njegovog odsustva i obavlja dužnosti koje mu prenese direktor. Ako direktor nije u mogućnosti ispunjavati svoje dužnosti i odgovornosti, ispunjava ih zamjenik direktora, sve dok ih direktor ponovo ne bude u mogućnosti preuzeti ili do imenovanja novog direktora. Zamjenik direktora za svoj rad odgovaran je direktoru.

2/01 Zamjenik direktora Državne agencije za istrage i zaštitu zamjenjuje direktora za vrijeme njegovog odsustva; ispunjava pojedine dužnosti koje mu prenese direktor te obavlja zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova. Ako direktor nije u mogućnosti ispunjavati svoje dužnosti i odgovornosti, ispunjava ih zamjenik direktora, sve dok ih direktor ponovo ne bude u mogućnosti preuzeti ili do imenovanja novog direktora.

3/01 Direktor Direkcije za koordinaciju policijskih tijela Bosne i Hercegovine predstavlja Direkciju; izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Vijeća ministara BiH te nacrt godišnjeg budžeta Direkcije i predlaže ih ministru sigurnosti BiH, koji ih prosljeđuje Vijeću ministara BiH na usvajanje; rukovodi i usmjerava obavljanje poslova iz nadležnosti Direkcije; izvještava javnost o radu iz svoje nadležnosti; podnosi godišnji izvještaj o radu Direkcije ministru sigurnosti BiH, koji ga prosljeđuje Vijeću ministara BiH, te posebne izvještaje prema potrebi ili na zahtjev ministra sigurnosti BiH; podnosi izvještaje Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev; obavlja i druge dužnosti

propisane zakonom i drugim propisima. Direktor je odgovoran za zakonitost rada Direkcije i za zakonito trošenje sredstava koja su joj dodijeljena.

3/02 Zamjenik direktora Direkcije za koordinaciju policijskih tijela Bosne i Hercegovine pomaže direktoru u obavljanju njegovih dužnosti, zamjenjuje direktora za vrijeme njegovog odsustva, ispunjava pojedine dužnosti koje mu prenese direktor, te izvršava zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova Direkcije. Ako direktor nije u mogućnosti ispunjavati svoje dužnosti, izvršava ih jedan od zamjenika direktora, sve dok direktor ne bude ponovo u mogućnosti da ih preuzme ili do imenovanja novog direktora.

III. MANDAT

Direktori i zamjenici direktora biraju se na mandat od četiri godine.

IV. OPĆI USLOVI

Kandidati za sve pozicije moraju ispunjavati sljedeće opće uslove: da su stariji od 18 godina, da su državljani Bosne i Hercegovine, da nisu otpušteni iz državne službe u institucijama BiH, odnosno entiteta kao rezultat disciplinske mjere u periodu od tri godine prije dana podnošenja prijave za upražnjene pozicije, da su zdravstveno sposobni za obavljanje navedenih poslova na koje se prijavljuju, da se protiv njih ne vodi krivični postupak, da nisu osuđeni za krivično djelo, osim krivičnih djela protiv sigurnosti saobraćaja, i da nisu obuhvaćeni odredbom člana IX. 1. Ustava Bosne i Hercegovine.

V. POSEBNI USLOVI

Pored općih uslova, kandidati za sve pozicije iz ovog javnog konkursa moraju ispunjavati i sljedeće posebne uslove, i to: da imaju visoku stručnu spremu - VII. stepen obrazovanja i radno iskustvo u toj spremi u trajanju od najmanje pet godina, da imaju čin glavnog inspektora policije ili viši čin i najmanje tri godine rada u tom činu i da nisu članovi političke stranke.

VI. POTREBNA DOKUMENTACIJA

Kandidat je dužan da uz prijavu na javni konkurs dostavi originale ili od nadležnog organa ovjerene kopije dokumenata:

1. radnu biografiju (CV) sa izjavom o nacionalnom opredjeljenju, adresu i telefon za kontakt;
2. uvjerenje o državljanstvu Bosne i Hercegovine, ne starije od šest mjeseci;
3. ovjerenu izjavu da nije otpušten iz državne službe u institucijama Bosne i Hercegovine, odnosno entiteta kao rezultat disciplinske mjere u periodu od tri godine prije dana podnošenja prijave za upražnjene pozicije;
4. uvjerenje da protiv kandidata nije pokrenut krivični postupak;
5. ovjerenu izjavu da nije obuhvaćen odredbom člana IX. stav 1. Ustava Bosne i Hercegovine;
6. ovjerenu kopiju fakultetske diplome (nostrificirane diplome ako fakultet nije završen u BiH ili je diploma stečena u nekoj drugoj državi nakon 6.4.1992.);
7. uvjerenje o radnom iskustvu u VSS;
8. dokaz da ima čin glavnog inspektora policije ili viši čin u trajanju od najmanje 3 godine;
9. ovjerenu i potpisanu izjavu da nije član političke stranke;
10. ovjerenu izjavu da je saglasan s vršenjem sigurnosnih provjera.

Napomena: Za sve kandidate koji dostave urednu i blagovremenu prijavu, po službenoj dužnosti, bit će izvršene provjere da li je osuđivan za krivično djelo, sa izuzetkom krivičnih djela iz oblasti sigurnosti saobraćaja.

Nepotpune i neblagovremene prijave neće biti razmatrane.

Tokom provođenja postupka odabira Nezavisni odbor Parlamentarne skupštine Bosne i Hercegovine kao nezavisno tijelo policijske strukture BiH razmotrit će prijave kandidata i s kandidatima koji ispunjavaju tražene uslove obaviti intervju. Po okončanju postupka odabira Nezavisni odbor dostavit će ministru sigurnosti BiH imena najviše pet kandidata za direktore i imena najviše pet kandidata za zamjenike direktora policijskih tijela BiH.

VII. OBJAVLJIVANJE KONKURSA

Ovaj konkurs objavljuje se u „Službenom glasniku BiH“, „Službenom glasniku Brčko Distrikta BiH“, u dnevnim novinama: „Dnevni avaz“, „Glas Srpske“ i „Dnevni list“, kao i na veb-stranici Parlamentarne skupštine BiH.

VIII. ROK ZA PODNOŠENJE PRIJAVA

Prijave na Javni konkurs s traženom dokumentacijom dostavljaju se preporučeno poštom, uz upozorenje „**NE OTVARATI**“, najkasnije 15 dana od dana objavljivanja u „Službenom glasniku BiH“, na adresu:

Parlamentarna skupština Bosne i Hercegovine - Nezavisni odbor

71000 Sarajevo, Trg BiH br. 1, s naznakom

„Javni konkurs za direktore i zamjenike direktora policijskih tijela Bosne i Hercegovine“